

Arim, 01 deg meyles 2021

Wali kan

TACEMLIT I UNEJMUË N YIDRIMEN Tiyri n twacult Djarrah n Tala Athmane

Urğin terza taddart lecnaya n win i tt-yessutren

Aṭas n tudrin i d-yejjamaen idrimen i yimuḍan i wakken ad dawin, lada i wid iwumi ilaq udawi deg tmura n berra.

Ayendin d amuḍin i yehlan, uyalen s tezmert-nsen yer twacult-nsen imi i d-tella tcemlit n unejmuë n yidrimen deg tudar. Tacemlit-a, dya, ha-tt-an tebda, ddurt-a, deg taddart n Tala Eetman, taɣiwant n Tizi Uzzu. Mbeed mi d-yessuter yiwen yilemzi afus n tallelt deg taddart i wakken ad eiwnen yemma-s ad tdawi deg Fransa, nnejmaen yimezday n taddart n Tala Eetman u fran-tt deg rray-nsen i wakken ad as-gen irebbi i usuter-agi. Ihi, xedmen taseqqamut i tiddin n tcemlit n unejmuë n yidrimen i yebdan leqdic-is ass-nni n lğmea, 26-02-2021, tameddit. Ad tkemmel tcemlit alamma yewweḍ wazal n yidrimen ara teḥwiğ tmuḍint-



a. Tezzin yilmezzen i d-yejjamaen idrimen yef tudrin akked temdinin n lwilaya n Tizi Uzzu. Ttruhun šbeḥ zik, yal wa s amekkan i t-yeenan : ad iruḥ

anda i t-tjerred tesseqamut n tiddin n tigawt. Syin, mi d-uyalen wid i d-ijemeen idrimen, ad ten-teḥseb tesseqamut u ad d-tefk leḥsab n wass-nni. Seg

tama-nniḍen, yettili-uhoggi n trubbuya ara yeffyen azekka-nni dayen. Ad awin yid-sen tibewwaḍin n unejmuë n yidrimen i wakken ad bdun tigawt-

nsen srid azekka-nni šbeḥ. Ayen yessefrahen u yettaken afud ameqqran, d lebyi akked tebyest i yesen yilmezzen yer tigawt-a : s lḥir i ttrağun ass i deg-i ara fyen s annar i wakken ad d-jemeen idrimen i tmuḍint-agi n taddart-nsen. Ttbanen-d yihulfan-nsen deg umeslaynsen alamma tyelliḍ d nutni i d imuḍan. Aya akk, yettak afud ameqqran i yimezday n Tala Eetman imi ilaq fell-asen ad d-jmeen qrib amelyar n yisenti-men. Acu kan, aya mačči d ugur imi ass amezwaru kan, jemeen-d 60 n yimelyan n yisenti-men. Ma yef lehlak n tmuḍint, u yef leḥsab n lekwayeḍ n yimejjawen, tameṭṭut-a, mmuten-as tgezgal-is i snat, syin tuyal ur tettwali ara. Ihi, ilaq-as udawi deg tmurt n Fransa.

Hocine Moula

Moussa, d mmi-s n tmuḍint Djarrah Taoues

“Lemdey-d tamsirt n turrugza d tcemlit n tudrin n Leqbayel”



Deg tdiwennit-a, newwi-d akked mmi-sn tmuḍint, Moussa, yef lehlak n yemma-ak akked wamek ara d-tili tcemlit n unejmuë n yidrimen.

Aymis n yimaziyen : Aql-ik tessutred deg taddart n Tala Eetman afus n tallelt. I wacuyer ?

Moussa : ssutrey afus n tallelt deg taddart n Tala Eetman, axater ilaq ad dawiy yemma, acu kan laqen-as aṭas n yidrimen, nekni ur ten-nessi ara.

Ma tsemred ad ay-d-tiniḍ dya, d acu-t lehlak-agi n yemma-k ?

Yebda-d lehlak-agi yer yemma, deg useggas n 2017 s waṭtan n uxenzir (cancer) deg tgezzeṭtis. Syin, celḥen-tt u kksen-as-tid. Acu kan, ur teḥli ara, ur yek-kis ara uxenzir-a akken yella. Ikemmel yenya-as tigezzelt-nni, syin yezi yer tis snat. Ihi teqqim akken mebla tigezzal, tettbeddil idammen kra n tikkal i ddurt deg sbiṭer. Meena, ur teqqim ara kan deg temsalt n tgezgal. Aṭṭan-agi n tgezgal,

yeslalay-as-d aṭṭan-nniḍen, win n wallen. Čiṭ čiṭ, armi yekfa deg-s usekkud. Neered ad tt-ndawi dagi deg tmurt n Lezzayer, meena ur tufi ara yur-s. Celḥen-as tiṭ-is, acu kan ur d-yelli kra n ugemmuḍ. Mačči kan ur tufi ara, meena tkemmel, ur tettwali ara maḍi. Azal n udawi kan n tiṭ-a, yesqamay-d 54 n yimelyan n yisenti-men. D areṭtal i ten-id-redley.

I wacuyer ara truḥ alamma d Fransa i wakken ad tdawi ?

Tamezwarut, ur tt-id-tettṣaḥ ara nnuba i ubeddel n tgezgal-is dagi deg tmurt n Lezzayer imi ugar n 1 200 n yimdanen i yellan deg wumuḡ n urağ. Yerna, am wakken yehbes ucelleḥ-a seg wasmi yebda waṭtan n Covid-19 imi amejjaw n ucelleḥ, yettas-d seg berra, snat n tikkal kan deg useggas. Dayen dagi, iğus mliḥ tukci n tgezgal mačči am Fransa anda ttaken tigezzal n wid yemmuten. Tis snat, adawi n wallen n yemma, ilaq deg Fransa imi ur d-yefki kra dagi deg tmurt agemmuḍ. Aya, d rray n yimejjayen i tt-yettdawin. Ihi, nekni nessaram ad tefey yer berra i wakken ad tt-dawi. Tin yur-s, ur tezmir ara ad

teḥlu allen-is ma yella ur tbeddel ara tigezzal-is. Ula d tamsalt n Visa, ilaq ad t-neḍleb s udawi n wallen-is mačči s ubeddel n tgezgal imi i yella dagi deg Lezzayer ucelleḥ n tgezgal.

I wacuyer ur as-tefkiḍ ara tigezzelt-ik kečč, dya ?

Lukan kan zemrey i wayen, a rrebḥ a tafat, meena yedḥa-d akken-nniḍen. Yef leḥsab n tesleḍt n yidammen-iw, ur tqebbel ara tfekka n yemma tigezzelt-iw nekk, ula d tigezzelt n baba, ur tt-tqebbal ara. Ihi, daymi ilaq ad tt-nawi yer tmurt n Fransa. Din ad terğū nnuba-as. Din, yella dayen waṭas n usirem. Yef waya i d-giy tiyri i taddart-iw Tala Eetman.

Amek dya i d-yella uqabel n tiyri-agi ?

Tidet kan, ferḥey ayendin s uqabel-is. Gan-iyi irebbi, tṭfen tamsalt nutni. Kkren s lebyi i wakken ad d-jemeen tadrimt ilaqen i udawi n yemma xas ulamma d tikkelt tamezwarut ara xedmen tigawt am tagi. Rran-iyi-id asirem u fkan wayeḍ i yemma i iḥulfan am wakken tuyal-itt-tudert s wadda. Urğin

ad tuyal lxir-nsen, lemdey tamsirt tameqqrant n turrugza d tcemlit n tudrin n Leqbayel. Seg tura d afella, aql-i d awaziw n yal tacemlit deg taddart. Ssulincan n Teqbaylit, ssulincan leewayeḍ n tjadit. Ad asen-iniḡ i wid akk i d-yefkan afus n tallelt, tanemmirt tameqqrant, leqder i as-tgam i yemma, ha-t-an yef tuyat-iw i lebda. Nessaram ad naweḍ yer yiswi-nney.

Awal n taggara...

Ass-a, iban-d wazal n wawal “Ticemlit n taddart”. Kksen-iyi yimezday akukru i bubbey weḥd-i, aḥal-aya. Ass-a, ten-nefsusi teekemt i refdey kan weḥd-i. Seg tama n yamma, walay čiṭ n ucmumeḥ mi akken i as-nniḡ nebda tacemlit n unejmuë n yidrimen i wakken ad truḥeḍ yer Fransa ad tdawid. Am wakken yuḡal-itt-rruh. Am win yemmuten, yekker-d. La wen-teqqar lxir-nwen, d ameqqran, ur yettwaktal ara ula s ddheb. Win ixedmen kra ad tyaf. Get azal i yimawlan-nwen. Get irebbi i kra n win i d-yerran yur-wen. Zḍet tagmat akked tayri gar-awen.

Yesteqsa-t Hocine Moula